

فريق التفريغ بموقع الطريق إلى الله
يقدم

اليوم الثالث من "سلسلة الطريق إلى القرآن"

(باللهجة المصرية)

لفضيلة الشيخ : الدكتور / حازم شومان

رابط المادة : <https://way2allah.com/khotab-item-114.htm>



السلام عليكم ورحمة الله وبركاته

إن الحمد لله نحمده ونستعين به ونستغفره، ونعوذ بالله من شرور أنفسنا ومن سيئات أعمالنا، إنّه من يهده الله فلا مضل له، ومن يضلل فلن تجد له هادياً مرشداً، وصلاة وسلاماً على سيد الخلق أجمعين، سيدنا محمد عليه أفضل الصلوات من رب العالمين إلى يوم الدين، ثم أما بعد

فيعني الواحد واحنا بنتكلم في السلسلة دي يا جماعة، الواحد بيفتكر أجمل أيام حياته والله، أيام الكلية أيام ما كان الواحد يعني إيه يعني كل جهده على علاقتك بكتاب الله سبحانه وتعالى، فالسلسلة دي مقصدها إن احنا نعيش المشاعر دي، إن احنا نعيش أجمل أيام حياتنا مع كتاب الله سبحانه وتعالى، إن احنا نعيش أعلى مشاعر ممكن أى إنسان يحسها في حياته مع كتاب الله سبحانه وتعالى

عشان كدة رسول الله صلى الله عليه وسلم كان بيدعى ويقول : " اللهم إني أسألك ... أن تجعل القرآن العظيم " صحيح ، إيه ؟ " ربيع قلبى " يعني إيه الربيع ؟ الربيع يا جماعة اللي هو المطر اللي ينزل من السما فتبتت به الأرض، يعنى الرسول كأنه بيقول يا رب خلى القرآن هو الماء اللي ينزل على قلبى فيحيا بيه قلبى ونور صدرى، يارب خلى القرآن هو النور اللي بينور لى طريقى يبقى الرسول شبه القرآن بالماء وبالنور، الماء اللي ينزل على قلبك يحيا به قلبك، والنور اللي يبقى قدامك فينور لك طريقك إلى الله سبحانه وتعالى، عشان كدة ما فيش حاجة هتعيشك إيمانياً أد القرآن، حتى السور المدنية اللي أحنا بدأين بالشرح فيها النهاردة بإذن الله سبحانه وتعالى

الجزء الثالث هندخل في سورة آل عمران بإذن الله سبحانه وتعالى، حتى السور المدنية يا جماعة مليانة معاني إيمانية هائلة لولا إن ما فيش وقت كنا وقفنا قدام كل سورة، و أعطينا درس خاص في التربية الإيمانية في سورة البقرة، التربية الإيمانية في سورة آل عمران، التربية الإيمانية في سورة النساء، ولكن احنا بنحاول، مش ممكن إن أحنا هنقدر في ساعة نفهم القرآن الكريم، احنا بنحاول ندوق ولو دُقنا هُنْدُمن علاقتنا بكتاب الله سبحانه وتعالى، لو دُقنا فعلاً جمال القرآن مش

هنسيبه بعد رمضان

أهم أهداف هذه السلسلة اللي مسمينها بإذن الله سبحانه وتعالى مدرسة القرآن، ولكن ماهياش مدرسة كبيرة ولا حاجة دي احنا لسة في كى جى ون كدة والا حاجة، أو في أولى ابتدائي حاجة لسة صغيرة كدة، ولكن آدى احنا دخلنا المدرسة إن شاء الله، يعنى عما قريب نلاقى نفسنا إن شاء الله في جامعة القرآن بإذن الله سبحانه وتعالى فالسور المدنية يا جماعة فيها آيات إيمانية كثير جداً، خدوا بالكوا انتوا بتسمعوها في صلاة التراويح فيها معاني إيمانية عالية جداً، ربنا سبحانه وتعالى لم يدع التربية القلبية في السور المدنية في عز آيات الأحكام، بل سورة زى سورة الزلزلة مكية ولا مدنية ؟ الزلزلة بتتكلم عن الزلزلة ويوم القيامة، يبقى لازم تبقى مكية صح ؟ صح سورة الزلزلة سورة مدنية، أنا بقول كدة ليه ؟ عشان اقولكم إن حتى في عز الأحكام ربنا ما تركش التربية الإيمانية أبداً، وأنت في عز التطبيق

لتكاليف الدين وفي عز الدعوة، وفي عز طلب العلم وفي عز الجهاد محتاج أنك دائماً تبقى قلبك مُتَّصِلَ بالله من خلال العبادة، ومن خلال الإيمانيات

يعنى إيه الإسلام؟... عنوان ديننا

هنبدأ الليلة النهاردة بإذن الله سبحانه وتعالى في سورة آل عمران، ولكن مش هنسب سورة البقرة قبل ما نعقب تعقيب ختامى ومهم جداً، يا جماعة سورة البقرة بتتكلم عن إيه؟ الكلمة اللى بتجمع محور سورة البقرة هي إيه؟ جه الوقت اللى أحنأ نتكلم في هذه النقطة، وهي مسألة الإسلام لله، الحاجة اللى كل العقوبات اللى تنزلت في السورة بسبب غيابها وكل الفتوحات اللى تنزلت في السورة بسبب وجودها هي الإسلام لله، عنوان ديننا ده، دينك مش اسمه الإنابة والا الاخلاص والا التقوى، دينك اسمه الإسلام طب يعنى إيه الإسلام؟ لما واحد يمسك مسدس في وش واحد كدة يقوله ارفع إيدك يرفع إيدك، امشى قدامى يمشى قدامه، اقعد يقعد، يبقى ده اسمه إيه؟ استسلام يعنى السمع والطاعة قهراً غصب عنك، هتضرب بالنار لو ما سمعتش واطعت، ولكن الإسلام أى السمع والطاعة، طوعاً عن رغبة وعن حب وعن اقبال قلب على الله سبحانه وتعالى، هو ده عنوان ديننا، عنوان ديننا أى السمع والطاعة لله ولكن بحب لله وياقبال قلب على الله سبحانه وتعالى فده أخطر معنى في الدين

يا جماعة سورة البقرة بتتكلم عن الإسلام، يعنى قصة آدم اللى في أول السورة ربنا بيقول في آخرها " **قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَنْ تَبِعَ هُدَايَ** " البقرة: ٣٨ " **تَبِعَ**" يعنى تبقى تابع، تابع يعنى تبعية، دى كلمة التبعية دى في الدنيا كلمة وحشة جداً، إنما مع الله هي الدين بتعنا إنك تبقى تابع للدين، يبقى عندك تبعية، يعنى إيه تبعية؟ تبعية يعنى امشى ورايا، حاضر، قُمت حودت يمين تحود ورايا، حودت شمال تحود ورايا، قعدت تقعد يعنى بتقلدني من غير ما تفهم أنا بعمل إيه، أهو هوا ده اللى ربنا طلبه مِنَّا في الدين، إن أحنأ نمشى ورا كلام ربنا و أوامر ربنا حتى لو مش فاهمين إحنا رايجين فين

ومرة طلب مننا الإلتباع في سورة طه " **فَمَنْ اتَّبَعَ هُدَايَ فَلَا يَضِلُّ وَلَا يَشْقَى** " طه: ١٢٣ الإلتباع إنك تبقى ماشى ورايا، بس فاهم أنا بعمل إيه، فاهم حكمة أنا حودت ليه وأنا قعدت ليه وأنا رجعت ليه، إنما التبعية ما انتش فاهم الحكمة، فالتبعية هي الإسلام لله، أنا من كتر تفتى فيك يا رب أنا سايب نفسى ليك

وَمَا كَادُوا يَفْعَلُونَ

بعد كدة في قصة بنى إسرائيل تعرضنا لقصة البقرة " **فَدَبَّحُوا بِهَا كَادُوا يَفْعَلُونَ** " البقرة: ٧١ قمة العناد لأوامر ربنا سبحانه وتعالى، يعنى الأخ ده تقوله اشتغل في الدعوة يابنى، اشتغل في الدعوة يا حبيبي، اشتغل في الدعوة عشان خاطرى، اشتغل في الدعوة عشان ربنا يجبك، عما يشتغل في الدعوة يكون خلاص مثلاً في آخر شهر في الجامعة كدة ولا حاجة، يكون هيسبب الجامعة خلاص بعد شهر " **وَمَا كَادُوا يَفْعَلُونَ** " اتبع سنة رسول الله يا أخى، البسى الحجاب يا أختي لما تلبس الحجاب " **وَمَا كَادُوا يَفْعَلُونَ** " البقرة: ٧١

أسلمت لك يا رب

بعد كدة تعرضنا لقول الله " **بَلَىٰ مَنْ أَسْلَمَ وَجْهَهُ لِلَّهِ وَهُوَ مُحْسِنٌ فَلَهُ أَجْرُهُ عِنْدَ رَبِّهِ وَلَا خَوْفٌ عَلَيْهِمْ وَلَا هُمْ يَحْزَنُونَ** " البقرة : ١١٢ " **أَسْلَمَ وَجْهَهُ** " يعنى إيه ؟ انت وشك ده هو اللي فيه سمعك وبصرك، يعنى أنا أسلمت سمعى ليك يا رب، وأسلمت بصرى ليك يا رب، مداخل القلب كلها بقت فى يدك يا رب، وناصيتى اللي فى وجهى اللي أنا بأقاد منها أسلمتها ليك يا رب، قدنى إلى حيث تشاء، يعنى أنا واثق فيك يا رب فخذ بناصيتى إلى ما تشاء " **مَنْ أَسْلَمَ وَجْهَهُ لِلَّهِ** " البقرة : ١١٢

بعد كدة دخلنا يا جماعة فى قصة سيدنا إبراهيم إمام المسلمين جميعاً على مر العصور " **إِذْ قَالَ لَهُ رَبُّهُ أَسْلِمْ قَالَ أَسْلَمْتُ** " البقرة : ١٣١ فورا إذ قال له ربُّه اشتغل فى الدعوة اشتغلت، قوم الليل قمت، البسى حجاب لبست، اترك المعاصى ترك فوراً، مافيش لحظة تردد " **قَالَ أَسْلَمْتُ لِرَبِّ الْعَالَمِينَ** " البقرة : ١٣١ بل " **وَوَصَّىٰ بِهَا إِبْرَاهِيمُ بَنِيهِ وَيَعْقُوبُ يَا بَنِيَّ إِنَّ اللَّهَ اصْطَفَىٰ لَكُمْ الدِّينَ فَلَا تَمُوتُنَّ إِلَّا وَأَنْتُمْ مُسْلِمُونَ** " البقرة: ١٣٢

هدف حياتك إنك تموت على الإسلام الكامل، إنك تموت على التطبيق الكامل لأوامر ربنا، فانت لازم كل يوم تقرب خطوة جديدة نحو الإسلام الكامل لله سبحانه وتعالى والسمع والطاعة لله

"سَمِعْنَا وَأَطَعْنَا " متى سنطبقها ؟

بعد كدة جت آيات الأحكام بتاعتنا وفى أولها على طول كدة " **وَمَا جَعَلْنَا الْقِبْلَةَ الَّتِي كُنْتَ عَلَيْهَا إِلَّا لِنَعْلَمَ مَنْ يَتَّبِعُ** " البقرة : ١٤٣ نعرف مين اللي هيسلم ؟ مين اللي هيسمع ويطيع ؟ ومين اللي مش هيسمع ويطيع ؟ وكانت الخاتمة المشرفة بتاعت سورة البقرة فى قول الله سبحانه وتعالى " **وَقَالُوا سَمِعْنَا وَأَطَعْنَا** " البقرة : ٢٨٥ عشان ربما يعرفنا فى الآخر كدة إن سورة البقرة دى كلها موضوعها " **سَمِعْنَا وَأَطَعْنَا** " إنما احنا مش كدة يا جماعة للأسف الشديد سمعنا وأطعنا دى عندنا بتتحور شوية، فيه بعضنا يقولك سمعنا ثم سمعنا، وبعدين يا بنى ثم سمعنا وبعدين هطيع امتى ؟ هو قاعد يسمع وخلص، سميع كبير على الفاضى كدة

وفى واحد تانى " **سمعنا واستمعنا !!** " الله الله، يا رب، تلاقيه مشغل سورة يوسف كدة فى كاسيت الميكروباص وماشى الصبح الله، يا رب، وهو مافيش أمر واحد فى القرآن مطبقه فى حياته سمعنا واستمعنا

وفى واحد تانى زى بعض الشباب اللي قاعدين كدة " **سمعنا بس !!** " ...إيه...؟ يا بنى اشتغل فى الدعوة ادع، ادع إلى سبيل ربك، بس أنا ما عنديش علم بس أنا مش عارف، يا بنى من غير ما تبسبس سمعت الكلام روح طبق وربنا سبحانه وتعالى هيعينك وهيبعتلك الزاد، ولما هتشتغل فى الدعوة هتتشجع على طلب العلم، وهتتشجع على العبادة وهتتشجع على الدين كله لأنك لا يمكن أنك تطلب من الناس حاجة أنت ما تعملهاش، وأنت عارف انك هتنزل تكلم أصحابك بكرة هتسهر الليلة تحضر الكلام اللي تقوله بكرة، يبقى المقصد يا جماعة إن فى " **سَمِعْنَا** " إيه ؟ بس ...

بس إيه ؟ بس دى ... مش عايزين بس

وفى طائفة رابعة " **سمعنا وفهمنا !!** " الأول قبل ما أطيع لازم أفهم، اقنعنى بالحجاب الأول وأنا التحجب اقنعنى بالأمر الفلانى وأنا انفذه يبقى سمعنا وفهمنا

في طائفة خامسة "سمعنا آه، أنا هسمع منك يا رب بس مش منك لوحذك !! " أنا هسمع من القرآن وهسمع برضه، زى لو تسمعوا عن روجيه جارودى، روجيه جارودى لما أسلم فقرئتلة كلمة عجبية جداً يعنى بيقول : " لقد أسلمتُ ولكن دون أن أتخلى عن قناعاتى السابقة " يا سلام يبقى انت لسه ما أسلمتتش أصلاً، الإسلام إنك على عتبة الباب كدة تقوم فاتح دماغك شاييل كل اللي فيها رمية فى الزبالة، فاتح قلبك شاييل كل اللي فيه رمية فى الزبالة، شاييل كل ماضيك ورميه فى الزبالة، وتقول يا رب أنا هبدأ صفحة جديدة مع الحياة كلها من خلال أوامرك وتوجيهاتك ووصاياك يا رب، هو ده الإسلام، إن خلاص ما فيش مرجعية فى حياتك لتلقى الأوامر غير من الله، ما فيش مرجعية فى حياتك لتلقى المفاهيم غير من الله سبحانه وتعالى

فى ناس تانيين يا جماعة يقولك سمعنا أه أنا سمعت أهوه، بس مصلحة الدعوة ! إن أنا ما عملش الموضوع ده " سمعنا بس يعنى فقه الأولويات !! " لا مش فقه الأولويات انى اطبق الكلام ده، سمعنا بس ايه ؟ فقه الواقع، فقه الواقع ما ينفعش إن أنا أطبق ! يعنى طبعاً الكلام ده أنا ما بسـخرش من حد من العاملين لدين الله، وما بنكرش خطورة فقه الأولويات وفقه الدعوة، ما بنكرش خطورة الحاجات دى، ولكن اللي بستنكره ان بعض الناس بيضع هذه المصطلحات أوثاناً يتعبد لله بها من دون القرآن بقت أصنام فقه الواقع، كذا يا بنى ربنا بيقول كذا، لا فقه الواقع كذا، فقه الأولويات كذا، يا بنى الله بيقول كذا، لا الأولويات كذا، فإذا يا جماعة لا نضع أى مصطلح بينا وبين كلام الله سبحانه وتعالى، النص نص فوق الجميع، وفهم النص أه نطق، فهم النص فقه الواقع والأولويات، ولكن ان احنا يبقى النص بيقول كلام وأحنا عشان شايفين الواقع فيه حاجة تانية نعمل الحاجة التانية ما ينفعش، فيعنى سمعنا

فيه " سمعنا وعصينا " دى طائفة احنا كلنا واقعين فيها للأسف الشديد، إيه سمعنا وعصينا !!! فيه دعاء منسوب لسيدنا داوود، يقال ان سيدنا داوود هو اللي قاله، فى القرآن بيقول " **حَتَّىٰ إِذَا بَلَغَ أَشُدَّهُ وَبَلَغَ أَرْبَعِينَ سَنَةً قَالَ رَبِّ أَوْزِعْنِي أَنْ أَشْكُرَ نِعْمَتَكَ الَّتِي أَنْعَمْتَ عَلَيَّ وَعَلَىٰ وَالِدَيَّ وَأَنْ أَعْمَلَ صَالِحًا تَرْضَاهُ وَأَصْلِحْ لِي فِي ذُرِّيَّتِي** " الأحقاف: ١٥ اسمع " **إِنِّي تَبْتُ إِلَيْكَ وَإِنِّي مِنَ الْمُسْلِمِينَ** " الأول قال أنا تبت، وبعد كدة قال أنا أسلمت، طب ليه التوبة قبل الإسلام ؟ لأن الإسلام ان أنا بسمع وأطيع لله، طب التوبة ؟ أنا بتوب من الذنوب، الذنوب دى حاجة من اتنين يا سمعت واطعت لهوايا لما سولى المعصية، يا سمعت واطعت للشيطان لما ازاغ قلبى تجاه المعصية

يبقى كل معصية تقع فيها قبح فى إسلامك لله، كل معصية ضد كلمة مسلم، كلمة مسلم عشان تكمل كدة لازم تبقى بعيدة عن المعاصى هى فى المشرق وأنت فى المغرب، يبقى كلمة سمعنا وعصينا ماتلقش بناس مسلمين لله سبحانه وتعالى أنا كنت عايز بس أعقب التعقيب الختامى ده على سورة البقرة يا جماعة، إن سورة البقرة بتتكلم عن الإسلام لله فلازم يبقى ده شعارك أنا عبد ليك يا رب " اللهم إنى عبدك وابن عبدك " أنا عبد وأبوي عبد وأمى أمة يعنى عبدة برضه، يعنى ده أنا نسبى عريق فى العبودية ليك يا رب، أنا عبد ابن عبد ابن عبد لغاية الجذ المليون، أنا عبد، فإنك أنت تعيش فى إنك أنت عبد، أنا يا رب هسمع وأطيع، أنا مسلم ليك يا رب، أنا هدف حياتى إن أنا أطبق كل أوامرك فى حياتى يا رب، الشعور ده يا جماعة هو ده اللي سورة البقرة تريد أن هى تزرعه فى قلوبنا

سورة آل عمران

هندخل على سورة آل عمران بإذن الله سبحانه، آل عمران ليه تتسمى بإسم آل عمران ؟ آل عمران دى أسرة صغيرة أوى، يعنى ماهياش أسرة كبيرة كدة، سيدنا إبراهيم وذريته أد إيه، سيدنا نوح وذريته من بعده أجيال إد أيه، ده آل عمران دول مين يا جماعة ؟ عمران، سيدنا عمران ومراة، امرأته خلفت مين ؟ مريم، ومريم خلفت مين؟ وفى التفاسير يقولك إن ده كانت بنتهم الوحيدة يعنى يقولك فى أحد أقوال التفسير دى بنتهم لم ينجبوا غيرها أصلاً، ومريم خلفت مين ؟ عيسى، وبعد كدة خلاص لم يتزوج ولم يُنجب سيدنا عيسى، يعنى هى أسرة مكونة من أب و أم خلفوا بنت، خلفوا السيدة مريم رضى الله عنها، وبعد كدة السيدة مريم أنجبت سيدنا عيسى بس

لماذا سميت السورة بسورة آل عمران ؟

ومع ذلك ربنا حط اسمهم على سورة من أطول سور القرآن طب ليه يا جماعة ؟ لأن آل عمران حققوا مواصفات هى اللى السورة تريد أن تحققها فينا، أول حاجة "إِذْ قَالَتِ امْرَأَتُ عِمْرَانَ رَبِّ إِنِّي نَدَرْتُ لَكَ مَا فِي بَطْنِي " آل عمران : ٣٥ ده ضناك ، ده ابنك، ده اللى انتى قاعدة بقالك سنين مستتياه، أغلى حاجة عندى ليك يا رب، أغلى حاجة بملكها هى اللى هقدمها لك يا رب، أنا مش بس أنا ليك وكمان الحاجات اللى غالية عندى فى حياتى ليك يا رب، اللى هو يا جماعة الربانية فى معاملة الله، الاخلاص الكامل لله، مافيش حاجة فينا غير لله سبحانه وتعالى

العقيدة والتوحيد

" رَبِّ إِنِّي نَدَرْتُ لَكَ مَا فِي بَطْنِي مُحَرَّرًا " آل عمران : ٣٥ يعنى إيه محرراً ؟ أصل الشهوات دى عبودية، يعنى من سنتين كدة لما واحد زميلنا مات، فدخلت الجامعة قلت بالتأكيد هيتعلق ورقة اشوف فيها العنوان بتاع العزى أروح أعزى فى، فدخلت فى الكلية اللى مات فيها فلقيت الاعلان متعلق وأنا ببص لقيت البنات والأولاد تحت الإعلان قاعدين يجروا وده يخبط فى دى، ودى مش عارف تشد ذراع ده وده مش عارف يجرى ورا دى، أنا قولت يا ربى هيا الناس دى مش زعلانة على صاحبها، أنا موقن إن قلبها بيتقطع على صاحبها ، إمال بتعمل كدة ليه ؟ دمه ما بردش، لسه جتته ما بردتش، بتعمل كدة ليه ؟ عارفين ليه يا جماعة ؟

لأنه مُستعبد للشهوات، مش قادر هوا هيموت من الحزن على صحبه، بس مش قادر يسبب الشهوات والمعاصى عشان كدة الشهوات والمعاصى عبودية بتبقى مُستعبد ليها، عشان كدة قالت " رَبِّ إِنِّي نَدَرْتُ لَكَ مَا فِي بَطْنِي مُحَرَّرًا " آل عمران : ٣٥ الحرية الكاملة ألا تكون عبداً إلا لله عشان كدة " مُحَرَّرًا " دى فى التفاسير قالوا يعنى خالصا مافيهوش حاجة لغير الله سبحانه وتعالى، فدى هى الحرية الحقيقية يا جماعة " فَتَقَبَّلْ مِنِّي " آل عمران : ٣٥ تقبل منى، انت بتقدمى لربنا أغلى حاجة عندك فى حياتك، وكمان بتقولى بس يا رب انت ترضى، بس يا رب انت تقبل تخيلوا يا جماعة انت بتقدم لربنا كل حياتك وكل طاقتك وكل الحاجات اللى أنت تملكها، وفى الآخر بتقول بس يا رب انت ترضى عنى يا رب، شافين الإيمانيات دى ؟ عرفنوا ليه السورة اتسمت باسمائهم ؟ لأن أول حاجة دول رمز لليقين والعقيدة والتوحيد، تانى حاجة رمز للتضحية، إن امرأة عمران ضحت بضناها الوحيد عشان ربنا سبحانه وتعالى بعد ما ضحت بنفسها عشان ربنا، وسورة آل عمران بتطلب منا كلنا إن احنا نضحى ليه ؟ هنقول دلوقتى، تالت حاجة إن

هما قدوة في الربانية، في معاملة الله سبحانه وتعالى، المشاعر الربانية الجميلة التي أحنا بنسمعها دى، بعد كدة سيدنا عيسى لما جه نبى اشتغل في الدعوة عليه الصلاة والسلام، يبقى قدوة في الدعوة إلى الله، وهما دول الحاجات اللي آل عمران بتطلبها مننا، عشان كدة اسم السورة ده هو ده حكمته والله أعلم

ليه آل عمران جت بعد البقرة ؟

طب يا جماعة آل عمران جت بعد البقرة ليه ؟ سورة البقرة احنا قعدنا نتكلم إزاي نبني ؟ إزاي نبني المجتمع ؟ عايزين نبني والتشريعات تيجي والعبادات تيجي، القبلة تتحول، قاعدين نبني واحنا بنبي قعدنا نتكلم أد إيه الدين ده عظيم، وأد إيه اللي يشوف الدين ده بالعظمة بتاعته هينبهر، وأد إيه اللي هيطلع على الإسلام ومفاهيم الإسلام هينبهر بالإسلام، انت فكرك إن أمريكا وإسرائيل وأوروبا وأعداء الدين هيسيبونا نبني الدين ده عشان الناس كلها تشوفه، عشان الناس تدخل في الإسلام ؟ لايمكن طبعاً، أكثر الناس دى لايمكن تسيبنا نبني يا جماعة، هتقف في وشنا حتى لايرتفع البناء، حتى لا تظهر سورة الدين العظيمة، فتيجي آل عمران اللي هي كله جاي هاجم على هذا البناء عشان يهدمه، عشان تقولك إن هما مش هيسيبونا في حالنا، مدام هنعمل لدين الله لازم هتلاقى أهل باطل في وشك

فسورة البقرة بتتكلم عن كيف يبني الإسلام وآل عمران بتتكلم عن كيف لا يهدم الإسلام، يبقى الاتنين موضعهم متكامل عشان كده كان رسول الله صلى الله عليه وسلم بيأمر على السرية اللي حافظ البقرة وآل عمران، لأن اللي فاهم البقرة وآل عمران يا جماعة، طبعاً الصحابة كانوا حافظين عن فهم، لأن الأحداث دى تنزلت أصلاً عليهم، اللي فاهم البقرة وآل عمران يا جماعة ده يحكم دولة، ده ممكن يحكم مجتمع، يعني لو وديناه موزمبيق دلوقتي يحكم موزمبيق، بعد خمس سنين هتلاقى موزمبيق من الدول الصناعية الكبرى ليه ؟ لأن هو فاهم إزاي يبني الدولة، وإزاي يحمي الدولة من الهدم بعد ما تبنى هذه الدولة

سورة آل عمران إذاً بتكلمنا عن أن الواقع كله هيهجم علينا، إن كل واحد على غير الإسلام هيحاول أنه يهدم هذا البناء بأى طريقة، عشان كدة سورة آل عمران كلها حرب من أولها، جو الحرب الهائلة على الإسلام، حرب شبهات وحرب جدال، وحرب نفاق وحرب سيف، والمشركين جاين في غزوة أحد مجمعين قوتهم عشان يجوا ياربونا، قال عمران بتقولك إنك هتتحارب من الجميع، وإن لما الدين يتحارب لازم يبقى في رجالة

مقدمة آل عمران

بتبدأ آل عمران بمقدمة مكونة من ١٨ آيه من أول آية واحد لغاية آية ١٨ من أول " الم * الله لا إله إلا هو الحي القيوم " آل عمران ١ : ٢ لحد قول الله " شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ قَائِمًا بِالْقِسْطِ " آل عمران: ١٨ دى المقدمة ١٨ آية، انتوا حضرتوا الجزء ولا لأ ؟ حضرتوه ولا لأ ؟ يعني ماشى، الله المستعان فاللي هيجي محضر يا جماعة هيفرق معاه والله جداً يا جماعة، اللي هيجي محضر هيستفاد تلت أربع أضعاف اللي هيجي مش محضر الجزء

فآل عمران بدأت بمقدمة مكونة من ١٨ آية المقدمة دي عبارة عن إيه ؟ " **الم * اللَّهُ لَا إِلَهَ إِلَّا هُوَ الْحَيُّ الْقَيُّومُ** " آل عمران ١ : ٢ " **الم** " الحروف المقطعة، احنا اتكلمنا في سورة البقرة قلنا دي بتدل على الثقة في الله، يعنى الحروف المقطعة عبارة عن ثناء على الله، وثناء على القرآن ليه ؟ ثناء على الله : إن من الحروف دي قال هذا القرآن العظيم وثناء على القرآن، القرآن العظيم اللي تكون من هذه الحروف، عشان كدة بعض الحروف المقطعة في السور بتاعت القرآن تلاقى بعدها يا ثناء على القرآن زي سورة البقرة " **الم * ذَلِكَ الْكِتَابُ لَا رَيْبَ فِيهِ** " البقرة

١ : ٢ يا ثناء على الله زي آل عمران " **الم * اللَّهُ لَا إِلَهَ إِلَّا هُوَ الْحَيُّ الْقَيُّومُ** " آل عمران ١ : ٢ بتبدأ بالثناء على الله ثم بعد كدة أول عدو بيحارب في الدين، أول نوع من أعداء الدين، سورة آل عمران المقدمة بتاعتها بتجمل الأعداء بتوع الدين قبل ما بتفصل مواجعتهم، أول عدو بيحارب في الدين

" **إِنَّ اللَّهَ لَا يَخْفَى عَلَيْهِ شَيْءٌ فِي الْأَرْضِ وَلَا فِي السَّمَاءِ** " آل عمران : ٥ ربنا بيكلم مين ؟ بيكلم ناس بيشتغلوا في الدرى، بيشتغلوا من غير ما حد يشوفهم كأنه بيقلهم أوعوا تفتكروا أن ربنا يخفى عليه شيء

" **هُوَ الَّذِي يُصَوِّرُكُمْ فِي الْأَرْحَامِ كَيْفَ يَشَاءُ** " آل عمران : ٦ دي اللي في الأرحام، اللي ما حدش شايف اللي جوه الله يعلم اللي جوه " **هُوَ الَّذِي يُصَوِّرُكُمْ** " لما أنتوا مكنتموش تعرفوا حاجة خالص، و أنتوا في أرحام أمهاتكوا

حرب الشبهات

" **لَا إِلَهَ إِلَّا هُوَ الْعَزِيزُ الْحَكِيمُ * هُوَ الَّذِي أَنْزَلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ** " آل عمران ٦ : ٧ فيه آيات أهل الزيغ والشبهات ما يعرفوش إن هما يتكلموا فيها، آيات مُحْكَمَة المعنى لا تحمل تأويلين، وفيه آيات تحمل تأويلين يعنى إيه تحمل تأويلين ؟ يعنى ممكن الآية تمشى كدة وممكن تمشى كدة، ولا يُحْكَمُهَا إلا الراسخين في العلم اللي فاهمين القرآن " **وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ مَا تَشَابَهَ** " آل عمران : ٧ يبقى أول أعداء بيحاربوا الدين حرب الشبهات اللي بيستغلوا الآيات اللي هي ممكن تحمل وجهين في التأويل، ويبدأ يقولك إيه ويبدأ يضرب هنا، طبعاً الكلام ده يعنى له تفصيل بإذن الله سبحانه وتعالى، ويبدأ يضرب هنا عشان يثير الشبهات يبقى أول أعداء في الدين الذين يُثيرون الشبهات " **هُوَ الَّذِي أَنْزَلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ مَا تَشَابَهَ مِنْهُ** " آل عمران : ٧ ليه ؟ " **ابْتِغَاءَ الْفِتْنَةِ** " عايزين يضيعوا يقين الشباب وعقيدة الشباب

" **وَابْتِغَاءَ تَأْوِيلِهِ وَمَا يَعْلَمُ تَأْوِيلَهُ إِلَّا اللَّهُ وَالرَّاسِخُونَ فِي الْعِلْمِ** " آل عمران : ٧ يبقى احنا عايزين الرسوخ في العلم " **يَقُولُونَ ءَأَمَّنَّا بِهِ كُلٌّ مِنْ عِنْدِ رَبِّنَا** " آل عمران : ٧ أصل أنا لما ألقى آية فيها اعجاز علمي في القرآن، وبعد كدة آية تانية أنا مش فاهم معناها هقول مادام دي من عند الله يبقى دي من عند الله، يبقى الآيات اللي أنت فهمتها ويقينك زاد بيها، تثبت يقينك في الآيات اللي أنت مش فاهمها " **كُلٌّ مِنْ عِنْدِ رَبِّنَا وَمَا يَذَّكَّرُ إِلَّا أُولُو الْأَلْبَابِ** " آل عمران : ٧ : **أُولُو الْأَلْبَابِ** دول بيقلوا إيه ؟ " **رَبَّنَا لَا تُرِغْ قُلُوبَنَا** " آل عمران : ٨ يا رب أهل الزيغ دول يا رب، احفظ قلوبنا أن قلوبنا تزيغ " **بَعْدَ إِذْ هَدَيْتَنَا وَهَبْ لَنَا مِنْ لَدُنْكَ رَحْمَةً إِنَّكَ أَنْتَ أَلْوَهَابُ** " آل عمران :

٨ أول طائفة حرب الشبهات

حرب السيف

الطائفة الثانية " إِنَّ الَّذِينَ كَفَرُوا لَنْ تُغْنِي عَنْهُمْ أَمْوَالُهُمْ وَلَا أَوْلَادُهُمْ مِنَ اللَّهِ شَيْئًا وَأُولَئِكَ هُمْ وَقُودُ النَّارِ * كَذَابِ آلِ
فِرْعَوْنَ وَالَّذِينَ مِنْ قَبْلِهِمْ " آل عمران ١٠ : ١١ اللى جرى ورا موسى، عايزين يدبحوا بنى إسرائيل، دخلنا فى حرب
السيف، الطائفة الثانية حرب السيف " قُلْ لِلَّذِينَ كَفَرُوا سَعْلَبُونَ وَتُحْشَرُونَ إِلَىٰ جَهَنَّمَ وَبِئْسَ الْمِهَادُ " آل عمران ١٢
هتتهزموا هتتهزموا فى معركة السيف، اليقين فى الله " قَدْ كَانَ لَكُمْ آيَةٌ فِي فِئْتَيْنِ التَّقَاتَا " آل عمران : ١٣
حق وباطل " فِتْنَةٌ تُقَاتِلُ فِي سَبِيلِ اللَّهِ " آل عمران : ١٣ ربنا يجعلنا منهم يا رب، من رافعى راية الحق اللهم آمين "
وَأُخْرَىٰ كَافِرَةٌ " آل عمران : ١٣ الكافرة بقى " يَرَوْهُمْ مِثْلِهِمْ رَأْيَ الْعَيْنِ " آل عمران ١٣ يعنى احنا نطلع نحارب
اليهود دلوقتي، احنا مثلاً عشرة اليهود يشوفونا عشرين تلتين أربعين ليه ؟ فى سورة الأنفال ربنا قال " وَيَقْلِلْكُمْ فِي
أَعْيُنِهِمْ " الأنفال ٤٤ يعنى ربنا كأنه قال للمؤمنين إن أنا قللتكموا فى عين المشركين

إنما هنا فى آل عمران كأنه قال أنا زودت أهل الحق فى عين الكافرين، هو يا رب المفروض إن احنا يعنى يشوفونا أكثر
من حجمنا ؟ ولا يشوفونا أقل من حجمنا ؟

نصرة الله أحياناً بتستوجب ده، وأحياناً بتستوجب ده، يعنى لما يكون أهل الحق ضعفاء قلة بيبقى مطلوب إن أهل
الباطل يشوفوهم قليلين، عارفين ليه يا جماعة ؟ عشان يستهينوا بيهم أوى فيدخلوا المعركة، وهما يعنى مرخين خالص،
وأهل الحق طبعاً قمة الحماس يدخلوا يطيروهم زى بدر

إنما لما يكون أهل الحق كثير فلو شافونا كمان أكثر وأقوى يقوموا من قبل ما يدخلوا المعركة يجيلهم إحباط قاتل،
يدخلوا المعركة وهما محبطين نقوم نظيرهم فيها برضوا، فلما يكون أهل الحق قلة مصلحة ، أهل الحق أنهم يتشافوا
أضعف وأضعف، لما يكونوا أهل الحق قوة وكثرة ودولة يبقى مصلحة أهل الحق إن هما يتشافوا أضعاف ليه ؟ عشان
يجيبوا إحباط لأهل الباطل فيخزل عنهم " يَرَوْهُمْ مِثْلِهِمْ رَأْيَ الْعَيْنِ وَاللَّهُ يُؤَيِّدُ بِنَصَرِهِ مَنْ يَشَاءُ إِنَّ فِي ذَلِكَ لَعِبْرَةً لِّأُولِي
الْأَبْصَارِ " آل عمران ١٣ يبقى أول حاجة حرب الشبهات، بعد كدة حرب السيف

ضعفاء الإيمان

العدو الثالث هى دى المصيبة " زَيْنٌ لِلنَّاسِ حُبُّ الشَّهَوَاتِ مِنَ النِّسَاءِ " آل عمران : ١٤ ضعفاء الإيمان، إحنا، يا
جماعة المشكلة الثالثة اللى بيواجهها الدين وربنا بيقولها فى أول السورة ضعفاء الإيمان، اللى زين ليهم حب الشهوات
من النساء، اللى كل قضيته بنت، وكل قضيته يلف بالعربية بتاعته أو بتاعت صحبه عشان يعاكس البنات " وَالْبَيْنِ
" آل عمران : ١٤ أنا عايز أتجوز عشان أخلف كثير " وَالْفَنَاطِيرِ الْمُقَنْطَرَةِ مِنَ الذَّهَبِ وَالْفِضَّةِ " آل عمران :
١٤ شاب بيقولى بس احنا نعمل المليون الأولانى، بعد كدة هتبقى سهلة إن شاء الله، عايز فلوس كل أحلامه دلوقتي
فلوس " وَالْحَيْلِ الْمُسَوِّمَةِ وَالْأَنْعَامِ وَالْحَرْثِ ذَلِكَ مَتَاعُ الْحَيَاةِ الدُّنْيَا " آل عمران : ١٤ ضعفاء الصف اللى أهل
الشبهات وأهل السيف ما انتصروش على هذه الأمة غير بسبب ضعفاء الصف، إحنا الثغرة اللى نُفِذْ لَدِينَا مِنْهَا " زَيْنٌ
لِلنَّاسِ حُبُّ الشَّهَوَاتِ "

في قول تاني لله سبحانه وتعالى في سورة الحجرات خدوا بالكوا يا جماعة " **وَلَكِنَّ اللَّهَ حَبَبٌ إِلَيْكُمْ الْإِيمَانَ وَزَيْنَهُ فِي قُلُوبِكُمْ** " الحجرات : ٧ ففي ناس زينت الشهوات في قلوبها، وفي ناس زين الإيمان والطاعة في قلوبها، عايزين إحنا نبقى من الصنف التاني

" **زُيِّنَ لِلنَّاسِ حُبُّ الشَّهَوَاتِ مِنَ النِّسَاءِ** " آل عمران : ١٤ فاكربين حديث الثلاثة والصخرة ؟ الراجل التاني اللي كانت له بنت عم ضحى بشهوة النساء عشان ربنا، والراجل الأولاني اللي هو كان بيبر أمه وأبوه وولاده البنين بتوعه قاعدين يشدوا في رجليه عايزين يكلوا، ضحى بشهوة البنين عشان ربنا عشان بر الوالدين، والراجل الثالث الفلوس والأنعام والخيال اللي نمأها للأجير اللي مشى وماخدش أجره، وبعد كدة الأجير جه خد الفلوس والخيال والأنعام دى كلها، ضحى بالأموال والأنعام عشان ربنا، يبقى حديث الثلاثة والصخرة بيقولك انك تضحى بكل دول عشان ربنا سبحانه وتعالى

علاج حب الدنيا

الآية اللي بعدها، اللي بعد حب الدنيا ؟ " **قُلْ أُوْتِبْتُكُمْ بِخَيْرٍ مِّنْ ذَلِكُمْ لِلَّذِينَ اتَّقَوْا عِنْدَ رَبِّهِمْ جَنَّاتٌ تَجْرِي مِنْ تَحْتِهَا الْأَنْهَارُ خَالِدِينَ فِيهَا وَأَزْوَاجٌ مُّطَهَّرَةٌ وَرِضْوَانٌ مِّنَ اللَّهِ** " آل عمران : ١٥ ربنا سبحانه وتعالى وضع آية حب الدنيا قبلها حرب الشُّبُهَات وحرب السيف، اللي هو هم الدين، وبعدها آية الجنة، كأن حب الدنيا علاجه إنه يتحط ما بين هم الدين وهم الجنة، أو حب الجنة تبقى مطرقة من ناحيتين تطحن حب الدنيا في القلب، يعني عايز تعالج حب الدنيا في قلبك ؟

كل ما هم الدين يزيد في قلبك وحب الجنة والشوق للجنة يزيد في قلبك، كل ما حب الدنيا يطحن في قلبك عشان كدة ربنا جاب دى ما بين دول، عشان كأنه يقولك هما دول العلاج، طب يا رب إذا التلت أنواع اللي هما خطر على الدين يا جماعة أهل الشُّبُهَات ثم أهل السيف، حرب السيف بعد حرب الشُّبُهَات، ثم أهل حب الدنيا يا رب أنت تُريد مننا إيه ؟ أنت تُريد مننا إيه ؟

" **وَاللَّهُ بَصِيرٌ بِالْعِبَادِ * الَّذِينَ يَقُولُونَ رَبَّنَا " آل عمران ١٥ : ١٦ دي الصورة اللي عايزين نوصلها "الَّذِينَ يَقُولُونَ رَبَّنَا إِنَّا أَمْنَا فَاغْفِرْ لَنَا ذُنُوبَنَا وَقِنَا عَذَابَ النَّارِ" آل عمران ١٦ خمس صفات اتوصفنا بيها " الصَّابِرِينَ وَالصَّادِقِينَ وَالْقَانِتِينَ وَالْمُنْفِقِينَ وَالْمُسْتَغْفِرِينَ بِالْأَسْحَارِ " آل عمران : ١٧ الصبر والصدق أول صفتين، لما الدين يتحارب أول حاجة لازم صبر ليه ؟ ما أنت دلوقتي هيلتزم على أيديك شاب، ده لسه كمان فيه خمسين ألف شاب ما التزموش، وأما يلتزم على أيديك دول، لسه فيه ألف بلد ما التزمتمش، وأما يلتزم على أيديك دول دى، لسه العالم كله على الكفر، عايزة صبر وعايزة صدق، لأنك لازم تضحى عشان دينك، وما يقدرش يضحى عشان دينه غير الصادق طيب يا رب عشان اقدر أصبر و أصدق " **الصَّابِرِينَ وَالصَّادِقِينَ وَالْقَانِتِينَ** " آل عمران : ١٧ أهل قيام الليل " **وَالْمُنْفِقِينَ** " آل عمران : ١٧ اللي بيطلعوا لله، ويبشتغلوا في صنائع المعروف " **وَالْمُسْتَغْفِرِينَ بِالْأَسْحَارِ** " آل عمران : ١٧ هو بعد قيام الليل يستغفر ربنا، فلا تزيده العبادة إلا انكسار على انكسار، كأن ربنا بيقولك أن زاد الصبر والصدق هو العبادة، فكل ما تعبد ربنا أكثر كل ما الصبر والصدق يزيدوا أكثر**

" شَهِدَ اللهُ أَنَّهُ لَا إِلَهَ إِلَّا هُوَ " آل عمران : ١٨ آخر آية في المقدمة " وَالْمَلَائِكَةُ وَأُولُوا الْعِلْمِ لَا إِلَهَ إِلَّا هُوَ " آل عمران : ١٨ زى أول آية زى أول القرآن " الم * اللهُ لَا إِلَهَ إِلَّا هُوَ " آل عمران ١ : ٢ أول آل عمران " قَائِمًا بِالْقِسْطِ " آل عمران : ١٨ " الْحَيُّ الْقَيُّومُ " آل عمران : ٢ يبقى ربنا بدأ المقدمة بما ختم به المقدمة، نفس الصفتين لله سبحانه وتعالى، طب ربنا يقول " شَهِدَ اللهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ " آل عمران : ١٨ يعني ربنا كأنه يقولنا اثبتوا، ربنا بيثبتنا ليه ؟

توضيحات المسلمون الأوائل

يا جماعة انتوا عارفين الصحابة داقوا إيه عشان الدين ده يُقام ؟ لما يبجي تدبر في القرآن المدني تحس إن الصحابة فعلاً اتبهدلوا بمذلة هائلة عشان الدين ده يُقام، يعني دلوقتي تلاقي الصحابة في أول مكة تعذيب مهول، يخرجوا من تعذيب أول مكة يدخلوا في شعب أبي طالب تلت سنين، مش لاقين ياكلوا، يخرجوا من شعب أبي طالب يدخلوا في مرحلة آخر مكة، الحرب الهائلة من جزيرة العرب كلها عليهم والحرب الإعلامية عليهم، يخرجوا من آخر مكة يطلب منهم الهجرة وترك الوطن وترك الأحباب وترك الأهل، يروحوا يهاجروا يلاقوا العرب كلها بترميمهم عن قوسٍ واحدة، كل شوية المشركين جايين جيوش وجايين لهم كل شوية ، المشركين جايين جيوش وجايين لهم يخلصوا من المشركين يطلعهم مشكلة الروم والفرس، ما هما بقوا قوة كبيرة لدرجة إن سيدنا عمر بن الخطاب كان يبقى نايم فواحد صحابي يروح يخط عليه في نص الليل، الصحابي يقولك ففرع عمر وقام وقال: " **أهجمت الروم ؟** " هيا الروم هجمت علينا ؟ يعني يا جماعة الصحابة كانوا عايشين مهديدين في أى لحظة بأى هجوم، ممكن اليهود يهجموا في أى لحظة، ممكن النصراني يهجموا في أى لحظة، ممكن المنافقين يعملوا أى حاجة في أى وقت، ممكن المشركين يجيوا جيش في أى لحظة، ممكن الفرس أو الروم يهاجموا في أى لحظة

احنا في سورة البقرة متين ستة وثمانين آية تحس إن انت روحك بتطلع من كتر المشاكل الموجودة في السورة، تخلص السورة تبجي تستريح تلاقي آل عمران المفروض استريحنا، مشاكل جديدة وهموم جديدة وابتلاءات جديدة ومعوقات جديدة، تخلص آل عمران متين آية يا رب خلاص استريحنا وخلصنا، تلاقي سورة النساء مشاكل جديدة ومعوقات جديدة وابتلاءات جديدة

فظول ما أنت ماشى لو أنت فاهم الآيات هتحس فعلاً الصحابة ضحوا أد إيه عشان الدين ده يُقام، وكان الدافعين اللي بيخلوهم يضحوا عشان الدين يُقام، الجنة وهم الدين ، أهوه الاتنين دول الجنة وهم الدين، الجنة اللي بسبب الجنة الصحابة تحولوا إلى استشهاديين، يعني يعملوا عمليات استشهادية عشان الجنة

البراء بن مالك لما قاهم ارفعوني على أسنة الرماح وارموني من فوق باب الحصن عشان أفتحولكوا من جوه، طب ما انت كدة هتقطع تحت اتقطع تحت دى عملية استشهادية يا جماعة، عشان ربنا وعشان الدين عشان الجنة

وفي نفس الوقت تلاقي سيدنا سعد بن خيثمة أبوه عايز يُخرج فيقولوا أخرج أنا الغزوة دى وأنت تقعد قال له : " **يا أبت لو كان غير الجنة لآثرتك** " لو كانت أى حاجة غير الجنة كان على راسي من فوق إنما الجنة لأ، لا أعرف أبويا ولا أعرف أخويا دى الجنة

لا تقولي والدي مش عايزني آجي أصلي، والا والدي مش عايزني آجي مش عارف أعمل إيه؟ والا مش عايزني أصحاب الملتزمين والا والدتي مش عايزاني ألبس نقاب، دي الجنة يا جماعة، **لو كان غير الجنة - تقول لأبوك كدة - لأطعتك و لكنها الجنة**، عشان هم الدين ده، عشان الجنة عملوا ده، عشان هم الدين سيدنا عبد الله بن رواحة لما جه يأكل حنة لحمه يتقوى بيها على الجهاد في غزوة مؤتة فسمع حطمة في جيش المسلمين يعني كركبة يعني في هجمة جاية على جيش المسلمين فقال: **" وأنت في الدنيا "** وأنت في الدنيا المسلمين يتحاربوا وتركها وانطلق وجاهد حتى استشهد في سبيل الله

وأنت في الدنيا أنت تقول كدة، وأنت في الدنيا فلسطين تضيع، وأنت في الدنيا المسلمات يُغتصبوا، وأنت في الدنيا يجيبوا المرأة الحامل يفتحوا بطنها يرموا الجنين ويحطوا قطة في بطنها ويحيطوا بطنها عليها يبقى الجنين مات، وأمه ماتت وأنت في الدنيا يحصل كده!! وأنت في الدنيا، فكان هم الدين والشوق الهائل إلى الجنة هما دول اللي مثبتين الصحابة في هذا الواقع، عشان كدة الحاجتين دول هما أكثر حاجتين لازم ندعمهم في قلوبنا

حرب الشبهات

بتخلص المقدمة ١٨ آية، يبدأ التفصيل، شوط طويل جداً من أول آية ١٩ لغاية آية ١٢٠، حرب الشبهات، مواجهة حرب الشبهات من أول قول الله **" إِنَّ الدِّينَ عِنْدَ اللَّهِ الْإِسْلَامُ "** آل عمران : ١٩ مواجهة اليهود والنصارى من أول **" إِنَّ الدِّينَ عِنْدَ اللَّهِ الْإِسْلَامُ "** لغاية **" إِنَّ تَمَسَّكُمْ حَسَنَةٌ تَسُؤُهُمْ وَإِنْ تُصِبْكُمْ سَيِّئَةٌ يَفْرَحُوا بِهَا "** آل عمران : ١٢٠ يبقى إذا الشوط ده كله شوط الرد على الشبهات وإدارة المعركة الفكرية، إدارة حرب الشبهات

حرب السيف

من أول ١٢١ ل ١٨٠ ستين آية عن غزوة أُحُد، اللي هيا حرب السيف، حرب السيف خدت ستين آية، اللي هيفهم آيات غزوة أُحُد ده يعني فعلاً يا جماعة من أخطر آيات القرآن على الإطلاق، ومن أشد آيات القرآن اللي بتزلزل القلب لما تُقرأ، والله الواحد فعلاً يظن إن لو كنا انتصرنا في أُحُد والستين آية دي ما نزلتش كنا احنا الخسرانين، الحمد لله إن احنا ما كسبناش في أُحُد والستين آية دول نزلوا، لأن كمية المعاني اللي فيهم والمفاهيم اللي فيهم والإيمانيات اللي فيهم أخطر من أي حاجة، أخطر من أي حاجة نخسرها في سبيل إن الآيات دي تنزل

مجادلة اليهود ثم الخاتمة

وبعد ما تخلص الستين آية بتوع حرب السيف خلاص الخاتمة، لأ ترجع تمن آيات تاني من أول آية ١٨١ لغاية آية ١٨٩ من أول **" لَقَدْ سَمِعَ اللَّهُ قَوْلَ الَّذِينَ قَالُوا إِنَّ اللَّهَ فَقِيرٌ وَنَحْنُ أَغْنِيَاءُ "** آل عمران : ١٨١ مجادلة اليهود مرة أخرى، مجادلة أهل الكتاب مرة أخرى، لغاية ما قبل الشوط الختامي اللي هو قول الله سبحانه وتعالى **" إِنَّ فِي خَلْقِ السَّمَوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لآيَاتٍ لِّأُولِي الْأَلْبَابِ "** آل عمران : ١٩٠ دي بداية الخاتمة، الصورة المُشرقة

بتاعة الناس اللي بيتوجهوا لله بالدعاء، ويتوجهوا لله بالعمل، عشان ربنا كأنه يقولنا الصورة بتاعة الخاتمة دي الصورة اللي أنا أريد أنكوا انتوا تحققوها آخر آية في آل عمران بتلملنا آل عمران كلها

" يَا أَيُّهَا الَّذِينَ آمَنُوا " آل عمران : ٢٠٠ نعم يا رب " اصْبِرُوا وَصَابِرُوا وَرَابِطُوا وَاتَّقُوا اللَّهَ لَعَلَّكُمْ تُفْلِحُونَ "

آل عمران: ٢٠٠ الآية دي تحسسك أن أحنا كنا في آتون، في فرن، في معركة، في معمة، ربنا بيقولك اصبر طب يا رب الصبر هينفد، صابر واستحمل وشد على نفسك واربط على قلبك بإذني عشان تستحمل، **ورابط الرباط هنا كان هو المكث في بيوت الله للعبادة عشان المعونة**، زي ما الرسول عليه الصلاة والسلام فصل هذا عشان المعونة التعبدية على مهام الجهاد والصبر والصدق، الترتيبة الإجمالية دي نخرج منها بيايه ؟ يعني الترتيبة دي ممكن ذهناك يجي في إيه وأنا بقول الكلام ده، إن أول حاجة في المقدمة ربنا جاب حرب الشُّبُهَات قبل ما يجيب حرب السيف صح ولا لأ، وبعد كدة آيات حرب الشُّبُهَات خدت في السورة ١٢٠ آية، آيات أُحُد خدت ٦٠ آية، يعني آيات حرب الشُّبُهَات خدت ضعف حرب السيف، وبعد كدة ربنا جاب ال ١٢٠ آية بتوع الشُّبُهَات أو ١٠٠ منهم قبل ما يجيب آيات أُحُد، قبل ما يجيب آيات السيف، يعني كأن ربنا بيقولك إيه أن **حرب الشُّبُهَات أخطر من حرب السيف**

حرب العقيدة والحرب الفكرية

حرب العقيدة دي أخطر من حرب السيف يا جماعة، الحرب الفكرية اللي أمريكا بتعملها من خلال العلمانية، من خلال الاستشراق، من خلال الفرقان اللي منزلينه، من خلال القنوات اللي قاعدة تبث شهوات ضد الشباب، من خلال الكلام ده أثره أخطر مليون مرة من إن هما ينزلوا يضربونا بالقنابل، لأن القنابل مش هتعمل فينا حاجة واحنا مع الله وعقيدتنا ثابتة

يبقى لازم نفهم يا جماعة خطورة المعركة الفكرية، طب ليه يعني بنقول الكلام ده ليه ؟ عشان نفهم احنا محتاجين نفهم ديننا، محتاجين إن احنا فاهمين ديننا، ما هو السيف ده اللي العضلات بتاعته أقوى طبعاً بعد نصره الله هيكسب فيه إن شاء الله، إنما الحرب الفكرية لأ، بل حرب السيف حتى لو ما عندكش عضلات وتوجهت إلى الله تكسب فيها، إنما الحرب الفكرية دي البقاء فيها للأفهم اللي فاهم أكثر، اللي فاهم عقيدته أكثر هو اللي يعرف ينتصر فيها

لازم نفهم ديننا يا جماعة، لازم نفهم مواطن العظمة بتاعة ديننا عشان ما حدش يعرف ينفذ لينا، عشان نقدر نحصن الشباب، عشان كدة من أهم فوايد دراسة القرآن أن والله العظيم لو جولك بعد كدة مليون واحد يثيروا ليك شُّبُهَات ضد القرآن، تقولهم روحوا العبوا بعيد ليه ؟ أنا خلاص شُفت في كتاب الله اللي يؤكد إن هذا الكتاب من عند الله، فطول ما احنا مرتبطين بالقرآن احنا مُحَصِّنِينَ ضد أى حرب، أى حرب جدلية أو أى حرب شُّبُهَات، يبقى حرب شُّبُهَات بعد كدة حرب السيف بتاعة أُحُد

بعد كدة شوط تاني حرب شُّبُهَات قبل الخاتمة ليه ؟ هوا ده اللي أمريكا عملته معانا أمريكا عملت معانا إيه ؟ وأوروبا طبعاً والغرب عمل معانا إيه ؟ بقأهم ١٠٠ سنة قاعدين يحاربونا حرب فكرية اللي هي معنى الإستشراق والعلمانية ويخدوا بعثات من عندنا ليهم بره يقعدوا يسموهم دماغهم، وبعد كدة يرجعوهم عندنا هنا عشان يبقوا رءوس فكرية

ورمز فكرية عندنا تقعد تسمم دماغ الشباب، يبقى قاعدين بقأهم ١٠٠ سنة حرب فكرية، بعد كده يضربوا العراق ويضربوا أفغانستان ويحتلوا فلسطين ليه؟ حرب السيف، ما خلاص العقيدة راحت، ادخل اضرب

بعد حرب السيف

شايف الذكاء بتاعهم، بعد حرب السيف ما تخلص المعركة، لأدى لازم حرب فكرية تانية، وهما بيغرفوا خالص تقضى عليهم خالص اللي هي أمريكا بتعملها دلوقتي في صورة إيه؟ كتاب الفرقان اللي هي بتنزله، وفي صورة حرب الشبهات اللي عاملاها على الإسلام، يعني ربنا في آل عمران بيقولنا بالظبط الناس دي بتحاربنا إزاي وبيقولنا بالظبط الناس دي بتفكر إزاي، وبيقولنا بالظبط أحنا نتعامل معاهم إزاي، ما هي دي رسائل ربنا لينا عشان نعرف نواجه هذا الواقع مش عايزين نطول في الكلام ده، عايزين ندخل يا جماعة في الشوط اللي احنا هنسمع يعني معظم صلاة التراويح الليلة هتبقى فيه إن شاء الله

إدارة معركة الشبهات

اللي هو شوط الجدل، اللي هو إدارة معركة الشبهات، اللي هو إدارة معركة الجدل، من أول قول الله سبحانه وتعالى " **إِنَّ الدِّينَ عِنْدَ اللَّهِ الْإِسْلَامُ** " آل عمران : ١٩ خدوا بالكوا من الحجة دي لأن أنا شخصياً بسبب عدم فهمي للنقطة دي راح مني قبل كدة حوالي سنة كدة يعني سنة من عمري بسبب إن أنا مافهمتش فقه القرآن في التعامل مع هذه المعركة إزاي؟ هنعقولوا " **إِنَّ الدِّينَ عِنْدَ اللَّهِ الْإِسْلَامُ** " آل عمران : ١٩ لاية " **قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ** " آل عمران : ٣١ شوط صغير كدة، في الأول عبارة عن الجدل مع اليهود، ده اليهود دول الجدل معاهم خد جزء كامل في سورة البقرة، هو القرآن بينجح في أهدافه، يعني اليهود في سورة البقرة قاعدين يجعجعوا، سورة البقرة قضت عليهم، صوتهم خفض فبقوا مش محتاجين غير صفحتين بس جدال، دلالة على أن القرآن بينجح في أهدافه بس بتظهر مشاكل جديدة اللي هي ظهرت في آل عمران مشكلة النصارى في شوط اليهود، ربنا ركز على حاجتين يا جماعة، ركز على جرميتين لليهود :

الجرمة الأولى

" **إِنَّ الدِّينَ يَكْفُرُونَ بِآيَاتِ اللَّهِ وَيَقْتُلُونَ النَّبِيِّنَ بِغَيْرِ حَقٍّ وَيَقْتُلُونَ الَّذِينَ يَأْمُرُونَ بِالْقِسْطِ مِنَ النَّاسِ فَبَشِّرْهُمْ بِعَذَابٍ أَلِيمٍ** " آل عمران ٢١ ما عندهمش ولاء لأهل الحق ممكن يقتلوا النبي، ممكن يقتلوا الداعية اللي طالع يقولهم اتقوا الله، مافيش ولاء لأهل الحق، بل الولاء بتاعهم لأهل الباطل أو اللي معاه، يبقى أول صفة إن ما عندهمش ولاء وبراء بل كفروا بالله سبحانه وتعالى

الصفة الثانية

" **أَلَمْ تَرَ إِلَى الَّذِينَ أُوتُوا نَصِيحًا مِّنَ الْكِتَابِ يُدْعُونَ إِلَى كِتَابِ اللَّهِ لِيَحْكُمَ بَيْنَهُمْ ثُمَّ يَتَوَلَّى فَرِيقٌ مِّنْهُمْ وَهُمْ مُّعْرِضُونَ** " آل عمران : ٢٣ ليه إن شاء الله؟ " **ذَلِكَ بِأَنَّهُمْ قَالُوا لَنْ**

تَمَسَّنَا النَّارُ إِلَّا أَيْامًا مَعْدُودَاتٍ وَعَرَّهْمُ فِي دِينِهِمْ مَا كَانُوا يَفْتَرُونَ " آل عمران : ٢٤ انتوا عارفين يا جماعة يعني إيه ؟ " وَعَرَّهْمُ فِي دِينِهِمْ مَا كَانُوا يَفْتَرُونَ "

عارفين النكتة اللي كنا بنسمعها زمان عن جحا لما جحا يعني دخل مكان كدة، ففى ناس كثير زحمة فعائز يفرق الناس عشان المكان يفضى له، قالمهم الحقوا قالوا له إيه ؟ قالمهم ده الشارع اللي ورانا ده فى واحد بيوزع فلوس ورا، فالناس قالوا له آه، فكل الناس طلعت تجرى على الفلوس، فجحا أما لقي نفسه لوحده آم قايل كل الناس دى أحسن يكون الناس دى كلها صح، مش معقول أنا ال ، لحسن يكون فعلاً فيه واحد بيوزع فلوس فى الشارع اللي ورانا، وقام رايح هو كمان يجرى لحسن بيكون فيه واحد بيوزع، يعني هو اللي افتراها وبعد كدة هو اللي إيه ؟ هو اللي شربها أهى دى **" وَعَرَّهْمُ فِي دِينِهِمْ مَا كَانُوا يَفْتَرُونَ "** قاعدين يفتروا على ربنا ويقولوا **" لَنْ تَمَسَّنَا النَّارُ إِلَّا أَيْامًا مَعْدُودَاتٍ "** قاعدين يحرفوا فى دينهم، وفى الآخر الحاجات اللي حرفوها هيا دى اللي يقعدوا يقولوا احنا متطمنين بيها لأن ربنا وعدنا وقالنا إن أنتوا من أهل الجنة، يا بنى ده انتوا اللي ألفتوا الكلام ده أصلاً فى دينكم يبقى إذا **" وَعَرَّهْمُ فِي دِينِهِمْ مَا كَانُوا يَفْتَرُونَ "** آل عمران : ٢٤ دي سخريه واستهزاء من الله سبحانه وتعالى بهم **" أَمْ تَرَى إِلَى الَّذِينَ أُوتُوا نَصِيحًا مِّنَ الْكِتَابِ يُدْعَوْنَ إِلَى كِتَابِ اللَّهِ لِيَحْكُمَ بَيْنَهُمْ ثُمَّ يَتَوَلَّى فَرِيقٌ مِّنْهُمْ "** آل عمران : ٢٣ ده عدم الاتباع يعنى ما بيسمعوش كلام الله، يبقى إذا عدم الولاء والبراء وعدم الاتباع

الولاء لله والتبرأ من الكافرين

عشان كدة ربنا فى نهاية هذا الشوط "جدال اليهود" أمرنا بالأمرين دول **" لَا يَتَّخِذِ الْمُؤْمِنُونَ الْكَافِرِينَ أَوْلِيَاءَ مِنْ دُونِ الْمُؤْمِنِينَ "** آل عمران ٢٨ اوعى تقف فى وجه مع مثلاً أمريكا ضد دولة إسلامية، اوعى زى الجنود اللي كانوا يبحاربوا فى الجيش الأمريكانى، جنود مسلمين فلما راحوا يحاربوا فى أفغانستان راحوا يحاربوا معاهم، فبعدين فتوى يقولوا يجوز إن احنا نحارب مع أمريكا ضد المسلمين من باب إن احنا بندافع عن وطننا، طبعاً حكم الله فى هؤلاء أنهم كفرة بالله، كفرة بكتاب الله، كفرة برسول الله صلى الله عليه وسلم، وفى هذا حديث فى صحيح البخارى

فإذا يا جماعة إذا الولاء والبراء ده دينك اوعى توالى أعداء الله، يجب أن تتبرأ من أعداء الله قولاً وفعلاً، بل تتبرأ من أهل المعصية، يعنى لو أصحابي بيعصوا ربنا ما ينفعش أمشى معاهم ؟ تمشى معاهم عشان تدعوهم، إنما فى غضبك لله ؟ دى أنا بحبهم، طب يا أخى حب الله فى قلبك مش أكثر، طب هما لهم فضل عليا وبيخدموني، يا أخى هو منة الله عليك مش أعلى وأظهر ؟ إزاي يا أخى ؟ يبقى إذا يجب أن يكون ولاءك لله وبراءك من كل من خالف الله سبحانه وتعالى

جدال اليهود... جدال النصارى

الأمر الثانى **" قُلْ إِنْ كُنْتُمْ تُحِبُّونَ اللَّهَ فَاتَّبِعُونِي "** آل عمران ٣١ الإلتباع كأن ربنا يقول اليهود ما عندهم ولاء وبراء وما عندهم اتباع، انتوا عندكوا ولاء وبراء وبقى عندكوا اتباع **" قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ وَيَغْفِرْ لَكُمْ ذُنُوبَكُمْ "** آل عمران ٣١ دى جدال اليهود يا جماعة، جدال النصارى ده الموضوع اللي احنا عاوزين نفهمه،

يعني كان جالي فترة قبل كدة بدأت أدرس مقارنة الأديان عشان يعني نبدأ نرد على النصارى ونبدأ، قعدت فيها فترة طويلة وكان أيامها الواحد لسه ما بدأش يهتم بالقرآن، لما بعدها بدأت أتجه للتفسير بدأت أفاجأ أن يعني سبحان ربى كل الحاجات اللي الواحد كان بيضيع فيها وقت طويل جداً موجودة في القرآن الكريم واحنا مش واخدين بالناس يعني من الحاجات اللي كان الواحد طاير بيها إن الديانة النصرانية العقيدة بتاعتها كلها، اكتشفوا بعد قيام علم مقارنة الأديان إن العقيدة بتاعت البوذيين والسيخ والهندوس، اللي هي قبل النصارى بألف سنة وأكثر العقيدة بتاعت الأتنيين نسخة من بعض يعني مسروق جمل كدة من كتب الهندوس محطوة في الإنجيل، فكان ده من الأسباب الأساسية اللي خلت أوروبا تكفر بالله جميعاً في أول القرن ده، ونشأ علم مقارنة الأديان واكتشفوا أن معظم العقائد اللي موجود في الكتاب المقدس مسروقة من الأديان السابقة فبدأت الناس تخرج من النصرانية فكانت طبعاً معلومة خطيرة جداً بالنسبة للواحد، فوجئت وأنا بقراً سورة التوبة بقول الله سبحانه وتعالى " وَقَالَتِ الْيَهُودُ عُزَيْرٌ ابْنُ اللَّهِ وَقَالَتِ النَّصَارَى الْمَسِيحُ ابْنُ اللَّهِ ذَلِكَ قَوْلُهُمْ بِأَفْوَاهِهِمْ يُضَاهِئُونَ قَوْلَ الَّذِينَ كَفَرُوا مِنْ قَبْلُ " التوبة ٣٠ طب ماهيا موجودة في القرآن وموجودة في آخر سورة المائدة " وَلَا تَتَّبِعُوا أَهْوَاءَ قَوْمٍ قَدْ ضَلُّوا مِنْ قَبْلُ وَأَضَلُّوا كَثِيرًا وَضَلُّوا عَنْ سَوَاءِ السَّبِيلِ " المائدة ٧٧ يا رب المعلومة، الكلام موجود عندنا في القرآن، طب واحنا بنشتت نفسنا ليه ؟ لو فهمنا القرآن هنفهم نرد عليهم إزاي

تاني حاجة يا جماعة انك تلاقي غالب أساتذة مقارنة الأديان في الجامعات المصرية وجامعات الأزهر كل قضيتهم لما يقعد مع واحد غير مسلم انه يقعد يشتمله في الكتاب المقدس ويطلع له الأخطاء بتاعته، ويقعد يشتمله في التناقضات والأخطاء العلمية غلط يا جماعة غلط، آل عمران بتقولنا الأسلوب ده غلط، والأسلوب ده ما بيدخلش حد في الإسلام، إمال أيه ؟ شوف

جدال النصارى أربع أشواط

الشوط الأول ... أصل القصة الصحيح

" إِنَّ اللَّهَ اصْطَفَى آدَمَ وَنُوحًا وَآلَ إِبْرَاهِيمَ وَآلَ عِمْرَانَ عَلَى الْعَالَمِينَ * ذُرِّيَّةً بَعْضُهَا مِنْ بَعْضٍ " آل عمران ٣٣: ٣٤ مين آل عمران دول ؟ ده آل عمران اللي هو عمران، ده اللي امرأته امرأة عمران، مين يعني امرأة عمران ؟ امرأة عمران دى اللي لما حملت نذرت لله اللي في بطنها محرر، مين اللي في بطنها ده ؟ دى اللي في بطنها طلع أنثى مش ذكر طلعت مين ؟ " وَإِنِّي سَمَّيْتُهَا مَرْيَمَ " آل عمران: ٣٦ بدأنا نفهم احنا فين، ده احنا دلوقتي بدأنا، ده احنا بنجيب القصة من الأول خالص، من الأول خالص من الجذور

بعد كدة جت مريم والسورة بتكلمنا عن التنشأة الإيمانية الربانية اللي نشأة فيها مريم، لدرجة إن كان بيتنزل عليها رزق الشتاء في الصيف ورزق الصيف في الشتاء، بعد كدة مريم بتكبر يا جماعة وصورة جانبية لسيدنا زكريا لما بيشفو الكرامات اللي ربنا اعطاها لمريم، وهو بيقول يا رب ولد، يا رب ادبنى ذرية طيبة، وربنا بيديلوه سيدنا يحيى، بعد كدة نستأنف تاني قصة مريم " وَإِذْ قَالَتِ الْمَلَائِكَةُ يَا مَرْيَمُ إِنَّ اللَّهَ اصْطَفَاكِ وَطَهَّرَكِ " آل عمران: ٤٢ ربنا تقبل عبادتها،

تقبل جهدها في العبادة واصطفاها على نساء العالمين " **يَا مَرْيَمُ اقْنُتِي لِرَبِّكِ وَاسْجُدِي وَارْكَعِي مَعَ الرَّاكِعِينَ** " آل عمران

٤٣ :

لما تطلع في الولاية لازم تزود عبادتك عشان تقترب من الله أكثر، فالعبادة لا تتوقف أبداً، الصورة المشرقة السيدة مريم كبرت، كُفِلت، بدأت تطلع في العبادة، اصطفت من قبل الله، الصورة المشرقة دى بعد كدة يجيء الملك ليُبشر

السيدة مريم بسيدنا عيسى، والفرع بتاع السيدة مريم إزاي ده أنا لم يمسنى بشر

بعد كدة ربنا بيرزقها سيدنا عيسى، بيطلع سيدنا عيسى عليه الصلاة والسلام والمعجزات اللي ربنا بينصره بيها إن هو يُحيي الموتى بإذن الله، ويرأ الأكمه والأبرص بإذن الله، ويُنبأ الناس بما يدخرون في بيوتهم بإذن الله، ويعمل تمثال طين كدة على شكل طير وينفخ فيه فيكون طير بإذن الله، ربنا بيحبلك المعجزات بتاعت سيدنا عيسى

بعد معجزات سيدنا عيسى بنى إسرائيل وجحودهم إزاي واجهوه، و أزاي الحواريين يعنى منهم اللي نصره ومنهم اللي تخاذل عنه، وبعد كدة ربنا رفعه سبحانه وتعالى وأنقذه من الصلب على يد اليهود والرومان ثم يختتم هذا الشوط بقول

الله " **ذَلِكَ نَتْلُوهُ عَلَيْكَ مِنَ الْآيَاتِ وَالذِّكْرِ الْحَكِيمِ * إِنَّ مَثَلَ عِيسَى عِنْدَ اللَّهِ كَمَثَلِ آدَمَ خَلَقَهُ مِنْ تُرَابٍ ثُمَّ قَالَ لَهُ كُنْ**

فَيَكُونُ * الْحَقُّ مِنْ رَبِّكَ فَلَا تَكُنْ مِنَ الْمُمْتَرِينَ " آل عمران ٥٨ : ٦٠ إيه اللي حصل ده ؟ أنا عايز واحد كدة يقولى

إيه اللي حصل ده ؟ أنا متوقع إن أنا لو هجادل النصارى يعنى أنا قبل، قبل ما الواحد يفهم الآيات دى أنا لو هجادل

النصارى مش هعمل الكلام ده، أنا لو هجادل النصارى هقولهم تعالوا انتوا عندكوا ١٥٠ خطأ علمى فى الكتاب

المقدس واحد : كذا، اتنين : كذا، تانى حاجة انتوا عندكوا ١٥٠ تناقض فى الكلام، تالت حاجة انتوا عندكوا بشارات

فى التوراة والإنجيل فى سيدنا محمد، رابع حاجة إنتوا عندكوا، ربنا ماعملش كدة يا جماعة، أول حاجة قال القصة من

جذورها خالص طب ليه ؟ هنقول إحنا مع بعض

الشوط الثانى...المباهلة

تانى محور فى جدال النصارى وهدم عقيدتهم " **فَمَنْ حَاجَّكَ فِيهِ مِنْ بَعْدِ مَا جَاءَكَ مِنَ الْعِلْمِ فَقُلْ تَعَالَوْا نَدْعُ أَبْنَاءَنَا**

وَأَبْنَاءَكُمْ " آل عمران: ٦١ الأطفال الصغيرين " وَنِسَاءَنَا وَنِسَاءَكُمْ وَأَنْفُسَنَا وَأَنْفُسَكُمْ " آل عمران : ٦١ كلنا فى ناحية

أهو، وانتوا فى ناحية " **ثُمَّ نَبْتَهِلْ فَنَجْعَلْ لَعْنَةَ اللَّهِ عَلَى الْكَاذِبِينَ** " آل عمران : ٦١ يعنى إيه ؟ يعنى كل واحد يقف قدام

التانى يقول يا رب لو أنا اللي على الباطل العنى، واعمل فىا وسوى فىا واخسف بيا الأرض والتانى يقول نفس الكلام،

إيه ده ؟ أيه المباهلة دى ؟ اسمها المباهلة يا جماعة، المباهلة دى، عايزة واحد يقينه زى الجبل، تخيل لو إن أنا قولتلك

دلوقتي قوم واقف فى المسجد و قول يا رب أنا لو مش على الحق العنى واخسف بيا الأرض، حاجة فظيعة يعنى، حاجة

عايزة واحد موقن يقين راسخ إن هو على الحق، المباهلة دى سلاح خطير

يعنى أحد علماء المسلمين لما إحدى الفئات الضالة اسمها القاديانية، يعنى قعدوا يفتروا على الإسلام فى هذا العصر

دعا رسمياً فى الجرائد زعيم الطائفة القاديانية إلى المباهلة، اللي هو انا وانت، اللي هو الكلام اللي بنقولوا ده، دعاه إلى

المباهلة و كان هذا، مُباهلة إيه ؟ هو عارف إن هو نصاب أصلاً فطبعاً ما استجابش، كان هذا الأمر سبب فى أن دخل

فى الإسلام وتاب إلى الله، تانى شخصية ! تانى أهم شخصية فى القاديانية على مستوى العالم، لأن هو الراجل صدم

إزاي ما.. ما.. اكتشف إن هو نصاب، يعنى فى جماعة لازم المبالهه دي بتخليهم يحسوا احنا موقنين بالحق بتاعنا قد إيه، آه تعالى باهلى، أنا مش خايف من حاجة، أنا موقن إن أنا الحق أنا موقن

شوف ربنا بيقول بعدها " **ثُمَّ نَبْتَهَلْ فَتَجْعَلْ لَعْنَةَ اللَّهِ عَلَى الْكَاذِبِينَ** " آل عمران : ٦١ شوف إن، شوف كام مؤكد جه فى الآية " **إِنَّ هَذَا هُوَ الْقَصَصُ الْحَقُّ وَمَا مِنْ إِلَهٍ إِلَّا اللَّهُ وَإِنَّ اللَّهَ هُوَ الْعَزِيزُ الْحَكِيمُ** " آل عمران ٦٢ " **إِنَّ**

هَذَا لَ " اللام بتاعت التوكيد أو القسم، "هُوَ" دى للتوكيد، " **الْقَصَصُ الْحَقُّ** " التوكيد بالألف واللام يبقى أربعة " **وَمَا مِنْ إِلَهٍ إِلَّا** " الحصر والقصر، يبقى توكيد أهو خامس " **وَمَا مِنْ إِلَهٍ إِلَّا اللَّهُ وَإِنَّ اللَّهَ هُوَ الْعَزِيزُ الْحَكِيمُ** " آل عمران : ٦٢

عشر مؤكديات بلاغية فى آية واحدة ليه ؟ هو ده أهل الحق يا جماعة، أهل الحق واثق فى اللى هو عليه، أهل الحق ده لو جابوله مين، لا يمكن، يعنى لو واحد جيه فالك أنا هقولك شبهات ضد وجود الله، وجود الله مين يا بنى أنت مجنون ؟ ده أنت لو جبتلى الستة مليار واحد اللى على وجه الكرة الأرضية كفروا بالله أنا يقينى بالله لا يتزعزع ولو تهنتك الحُجُب ما زدت يقيناً حينما أرى ربى، آه والله يا جماعة، دى قضية بديهيه زى الشمس فى وسط السما كده " **وَإِنَّا**

أَوْ إِنَّا كُمْ لَعَلَى هُدًى أَوْ فِي ضَلَالٍ مُّبِينٍ " سبأ : ٢٤ " **فِي ضَلَالٍ** " عدت إنما " **لَعَلَى هُدًى** " مع الهدى، مع الهدى جت لام التوكيد والقسم، أنا موقن إن أنا على الحق، فأصل الاعتقاد فى الحق اليقين، و فأصل الاعتقاد فى الباطل الشك، يعنى خد بالك لو جيت تقف مع واحد غير مسلم فى أى يوم فى حياتك، ايقن إن هو مهزوز من جوه، وإنه شاكك من جوه، وإنك انت يقينك بدينك خمسين ألف مرة قد يقينه بدينه، خدوا بالكوا من هذا الكلام يا جماعة، ده كلام عن تجارب كثيرة جداً يعنى من القرآن ومن الواقع، يبقى إبدأ بعد كدة المبالهه دى الشوط التانى

الشوط الثالث ... حوار الأديان

" **قُلْ يَا أَهْلَ الْكِتَابِ تَعَالَوْا** " آل عمران : ٦٤ اطلعوا " **تَعَالَوْا إِلَى كَلِمَةٍ سَوَاءٍ بَيْنَنَا وَبَيْنَكُمْ** " آل عمران : ٦٤ حوار أديان، أهو القرآن بيقول ب حوار الأديان، بس حوار أديان مش بالمنظر اللى بيتعمل دلوقتى، ده منظر تانى " **تَعَالَوْا إِلَى كَلِمَةٍ سَوَاءٍ بَيْنَنَا وَبَيْنَكُمْ** " (آل عمران ٦٤) تعالوا نتفق، هنتفق على إيه ؟

١. " **أَلَا نَعْبُدُ إِلَّا اللَّهَ** " (آل عمران ٦٤) هى دى فيها إختلاف ؟

٢. " **وَلَا نُشْرِكُ بِهِ شَيْئًا** " (آل عمران ٦٤)

٣. " **وَلَا يَتَّخِذَ بَعْضُنَا بَعْضًا أَرْبَابًا مِنْ دُونِ اللَّهِ** " آل عمران : ٦٤ مش واحد يقعدلى على كرسي الإعتراف، ويجى قدامه واحد تانى رجل دين، ويقوله أنا أذنبت فى كذا وكذا وكذا اغفرلى، اغفر لى إيه ؟!

" **وَلَا يَتَّخِذَ بَعْضُنَا بَعْضًا أَرْبَابًا مِنْ دُونِ اللَّهِ** " ما نعطيش ما لله لبشر، زى ما هما بيعملوا مع رجال الأديان بتوعهم، يعطوا ما لا يجوز إلا لله للبشر، ويفتروا على الله بيؤهوا رجال الدين بتوعهم " **وَلَا يَتَّخِذَ بَعْضُنَا بَعْضًا أَرْبَابًا مِنْ دُونِ**

اللَّهِ " حوار الأديان الإتفاق على مبادئ الوحداية الأساسية

الشوط الرابع والأخير ... مقارنة الأديان

من أول قول الله سبحانه وتعالى " **وَدَّتْ طَائِفَةٌ مِنْ أَهْلِ الْكِتَابِ لَوْ يُضِلُّوكُمْ وَمَا يُضِلُّونَ إِلَّا أَنْفُسَهُمْ وَمَا يَشْعُرُونَ** " آل عمران : ٦٩ الشوط الرابع يا جماعة اللى هو فضحهم، اللى هو مقارنة الأديان، دى بعد تلت أشواط مقارنة

الأديان، الشوط الرابع اللي هو ربنا بيفضحهم، بيفضح خبيثتهم ناحيتنا " **وَقَالَتْ طَائِفَةٌ مِنْ أَهْلِ الْكِتَابِ آمِنُوا بِالَّذِي أُنزِلَ عَلَى الَّذِينَ آمَنُوا وَجَهَ النَّهَارِ وَكُفُّوا أَعْرَهُ لَعَلَّهُمْ يَرْجِعُونَ** " آل عمران: ٧٢ يعني إيه ؟
يعنى يجى واحد كدة منهم يجى الصبح أنا عرفت إن الإسلام هو الحق، وأنا قررت إن أنا أسلم بالله، ونفرح بيه ونطير بيه ويقوم جاي بالليل يقول أنا ارتديت تانى والعباد بالله، البعيد ارتد تانى ليه ؟ اكتشفت إن الدين بتاعهم وحش، يقوم يهز المسلمين، يعنى شوفوا بيخططوا ضدنا أد إيه ! ربنا بيفضح تخطيطهم ثم ربنا، هنا حملة صارخة عليهم وعلى رجال الدين بتوعهم

" **وَمَنْ أَهْلَ الْكِتَابِ مَنْ إِنْ تَأْمَنَهُ بِقِنطَارٍ يُؤَدِّهِ إِلَيْكَ** " آل عمران: ٧٥ الإنصاف بتاع الإسلام " **وَمِنْهُمْ مَنْ إِنْ تَأْمَنَهُ بَدِينَارٍ لَا يُؤَدِّهِ إِلَيْكَ إِلَّا مَا دُمْتَ عَلَيْهِ قَائِمًا** " آل عمران : ٧٥ حب الدنيا اللي عندهم، السرقة والإستغلال والجور على حقوق الناس

" **وَأَنَّ مِنْهُمْ لَفَرِيقًا يَلُؤُونَ أَلْسِنَتَهُم بِالْكِتَابِ** " آل عمران : ٧٨ يقعد كدة يعمل بصوته كدة، زى ما إحنا بنعمل بصوتنا مثلاً و إحنا بنقرأ القرآن، قال يعنى لما تسمع الكلام ده تقول دى كلام من عند الله " **وَمَا هُوَ مِنَ الْكِتَابِ** " آل عمران : ٧٨ :

" **وَأَنَّ مِنْهُمْ لَفَرِيقًا يَلُؤُونَ أَلْسِنَتَهُم بِالْكِتَابِ لِتَحْسَبُوهُ مِنَ الْكِتَابِ وَمَا هُوَ مِنَ الْكِتَابِ وَيَقُولُونَ هُوَ مِنْ عِنْدِ اللَّهِ وَمَا هُوَ مِنْ عِنْدِ اللَّهِ** " آل عمران : ٧٨ هنا ربنا بيدكرنا بالتناقضات اللي فى التوراة والإنجيل، والأخطاء العلمية اللي من أول صفحة هنا وهنا بتلاقيها، مقارنة الأديان، هدم الدين بتاعهم " **وَمَا هُوَ مِنْ عِنْدِ اللَّهِ وَيَقُولُونَ عَلَى اللَّهِ الْكَذِبَ وَهُمْ يَعْلَمُونَ** " آل عمران : ٧٨ :

ثم نأتى إلى قول الله سبحانه وتعالى " **وَإِذْ أَخَذَ اللَّهُ مِيثَاقَ النَّبِيِّينَ لَمَا آتَيْتُكُمْ مِنْ كِتَابٍ وَحِكْمَةٍ ثُمَّ جَاءَكُمْ رَسُولٌ مُصَدِّقٌ لِمَا مَعَكُمْ لَتُؤْمِنُنَّ بِهِ وَلَتَنْصُرُنَّهُ** " آل عمران : ٨١ البشارات بسيدنا محمد فى التوراة والإنجيل، فى التوراة جملة كدة " **النبي الذى أقبل من فاران** " اللي هى مكة " **ومعه عشرة آلاف قديس** " تصوير فتح مكة موجود فى التوراة، بل اسم رسول الله صلى الله عليه وسلم بالإسم موجود فى الإنجيل، بالحرف موجود كلمة برقليطس للى فى كتب مقارنة الأديان بالحرف معناها كلمة أحمد

بل اسم أحمد موجود فى التوراة بالحرف ولم يُحرف حتى الآن اسمه موجود بالتوراة بالحرف، اللي بيقرأ فى الكتب بتاعت مقارنة الأديان بيلاقى الكلام ده بالظبط، بشارات وراء بشارات، بشارات وراء بشارات، فرينا بيقولنا هنا كلموهم عن بشارات التوراة والإنجيل كلموهم، مقارنة الأديان يا جماعة، حتى ينتهى هذا الشوط بقول الله سبحانه وتعالى " **يَا أَهْلَ الْكِتَابِ لِمَ تَكْفُرُونَ بِآيَاتِ اللَّهِ وَاللَّهُ شَهِيدٌ عَلَىٰ مَا تَعْمَلُونَ** * **يَا أَهْلَ الْكِتَابِ لِمَ تَصُدُّونَ عَن سَبِيلِ اللَّهِ مَنْ آمَنَ تَبْغُوهَا عَوجًا وَأَنْتُمْ شُهَدَاءُ وَمَا اللَّهُ بِعَاقِلٍ عَمَّا تَعْمَلُونَ** " آل عمران ٩٨ : ٩٩

عقيدة النصارى !!!

إيه الحكمة بتاعت الأربع أشواط دول ؟ أول حاجة ذكر القصة من الأصل، اللي هو قبل ما أبطل الباطل أظهر الحق يا جماعة، قبل ما أكلم الناس دى عن الأخطاء اللي فى دينهم، أكلمهم عن العظمة اللي فى دينى الأول، لما نروح

للناس دى ونقولها القصة الجميلة المشرقة دى، وبعد كدة نقولها بقى إنتوا تصدقوا القصة دى ولا تصدقوا إن مش عارف سيدنا آدم غلط، وربنا غضب على البشر عشان خطيئة واحد هما ما همش دعوة بيه أصلاً!!! يعنى واحد أخطأ إنت مالك؟؟ حتى لو أبويا أخطأ أنا مالى؟؟؟ " لا تَزِرُ وَازِرَةٌ وِزْرَ أُخْرَى " الإسراء : ١٥ فربنا بسبب غضبه على البشر جه بعد كدة قام منزل ابنه عشان ابنه يتصلب ويتبهدل عشان يغفر خطيئة البشر!!! يعنى ذنب انت ما أذنبتوش وقام جاي واحد برضه إنت مالکش دعوة به، أنا مالى أصلاً دى قصة أنا ماليش دعوة بيها خالص، وبعد كدة مات تلت أيام!!! والكون كان من غير إله تلت أيام!!! وبعد كدة ربنا بعد تلت أيام صحى وما عرفش إيه!!! التليخ ده إيه ده!!!؟

تكلم عن دينك مع غير المسلمين

بالله عليك لما تتعرض القصة دى، القصة دى ولا دى؟ يبقى يا جماعة أول خطوة لهدم الباطل إظهار الحق، قبل ما نتكلم عن دينهم نتكلم عن ديننا يا جماعة، وهنتكلم عن ديننا إزاي إلا لو فاهمينه، يبقى لو وقفت مرة مع أى حد من غير المسلمين :

١. اعرضلوا القرآن الأول :

كلمه عن القرآن الأول، كلمه عن القرآن بيتكلم عن ربنا إزاي وبيتكلم عن الرسل إزاي، وإزاي إن القرآن مليون أخلاقيات ومليان مبادئ ومليان إعجاز وو ، يبقى نتكلم عن الحق

٢. ثم المباهلة :

بعد ما عرضت الحق، عرضت مدى ثقى فى الحق، فى أحداث ١١ سبتمبر قالوا إن ألوف مؤلفة فى أمريكا دخلوا فى الإسلام عارفين ليه؟ إنتوا عارفين ليه؟ هو العمل أصلاً يعنى ما حدش يدخل فى دين بسبب إن عمل حاجة زى دى، إنتوا عارفين ليه؟ الناس مش قادرة تصدق إن فى واحد عنده يقين بعقيدته لدرجة أنه يفجر نفسه عشان دينه، عشان كدة العمليات بتاعت فلسطين بتزلزل الناس دى، إيه الدين اللى يخلى واحد يلغم نفسه ويقطع نفسه مليون حته عشان دينه

الحاجات دى يا جماعة بتزلزل قلوبهم، لأن الدين الإسلامى هو الدين الوحيد اللى بيزرع يقين لا حدود له فى قلب مُتَّبِعِهِ، لأنه دين ربنا كله نور على نور، فبتلاقى نفسك عندك يقين ١٠٠%، فالمباهلة دى وما على أمثالها لازم نوصل للناس دى إحنا موقنين بديننا قد أياه، إنما لما يشوفوا الجامعة دلوقتى موقنين بإيه؟ دين إيه ده، دى الناس دى يعنى واضح إن هما أصلاً شاكين فى دينهم، مش مصدقين دينهم

٣. حوار الأديان :

نقف مع بعض كدة عشان نورى الناس التسامح بتاعنا، ونورى الناس المبادئ الجميلة بتاعتنا، وبتناظر كدة قدام الناس كلها ونوصلهم مبادئ الإسلام

٤. مقارنة الأديان :

ثم آخر حاجة يُهدم بيها هذه الأديان مقارنة الأديان، تعالوا أما أقولكوا الأخطاء العلمية اللي عندكوا، اللي هي هدم الباطل، بعد احقاق الحق إبطال الباطل، تعالوا أما أقولكوا الأخطاء العلمية اللي عندكوا والإعجاز العلمي اللي عندي، تعالوا أما أقولكوا البشارات اللي عندكوا بسيدنا محمد في التوراة والأنجيل، بل في الكتب اللي قبلها كمان، العقاد له كتاب جايب فيه بشارات بسيدنا محمد في كتب الهندوس، في كتب بتوع الهند والصين، سبحان ربي، كأنها كانت كتب فعلاً فيها آثار من التعاليم السماوية

تعالوا أما أجيب لكوا الأقوال اللي في كتبكوا اللي بتؤكد إن سيدنا عيسى بشر وليس غير بشر، سيدنا عيسى بنفسه في ٥٠٠ جملة في الكتاب المقدس يقول أنا بشر، ٥٠٠ جملة في كتاب يعنى من الكتب ألفه أحد المسلمين، أحد علماء مقارنة الأديان، تعالوا أما أقولكوا أفصح خبيثكوا ضدنا وتعالوا أما أفصح أخلاقياتكوا وتعالوا أما نهدم هذا الدين بنقاط الهدم الموجودة فيه، وفي كتابه الذين افتروه على الله سبحانه وتعالى

لنصرة الإسلام

يبقى إذاً الكلام اللي أنا عايز أخرج بيه من ده كله إيه؟ إن أول خطوه لنصرة الإسلام هو ظهور صورة الإسلام ودي آخر حاجة هنختم عليها بإذن الله في هذا الدرس يا جماعة، إن أول حاجة لنصرة الدين أن صورة الدين تظهر يا جماعة يا جماعة آل عمران كلها حرب عشان حاجة واحدة بس، عشان صورة الدين الرائعة اللي في البقرة دي ما بتظهرش قدام الناس، اعرفوا الناس دي خايقة من إيه عندنا، الناس دي خايقة من نموذج الملتمزم المتكامل اللي وجهه منير اللي مجتهد في الدين، اللي أخلاقياته عالية، اللي فاهم دينه صح، وفاهم يتكلم عن دينه صح، وفاهم نقاط الإعجاز في دينه صح، ده اللي مخوف الناس دي يا جماعة

الناس دي مرعوبة، عشان كدة الاعلام الغربي كله أول ما يحصل أى حاجة فيها دم ولا حاجة عند المسلمين يقوموا جابينها، على طول قاعدين يفتروا علينا، على طول قاعدين يثيروا شُبُهات علينا في الإعلام بتاعهم ليه؟ عشان يشوهوا صورة الدين الجميلة برة

فإحنا عايزين نظهر صورة ديننا، عايزين عظمة الإسلام، الناس دي تعرفها ولو عرفتها كلهم هيدخلوا في الإسلام كلهم لما زمان عظمة الإسلام ظهرت على جيل الصحابة، لما تفرقوا في نص الأرض في الفتوحات نص الأرض دخلت الإسلام ليه؟ لأنهم شافوا صورة الدين، إحنا مش ممثلين لصورة الدين، إحنا اللي يشوفنا ما يشوفش صورة الدين، اللي يشوفنا يشوف صورة مشوهة، صورة مُتميعة، صورة بالعكس، صورة معكوسة أو مغلوطة زي اللي برة

إنما صورة الدين اللي لما الناس شافتها زمان، العالم كله والحضارات كلها والأفكار كلها والأديان كلها ركعت تحت قدمي الإسلام، وخضعت تحت قدمي الإسلام، وكله دخل في الإسلام، يبقى عاوزين نعرف سر قوة ديننا، إن صورة الدين الحقيقية تظهر، إن مبادئ الدين بتاعتنا تظهر، ليس فقط في الكلام ولكن في نماذج عملية اللي هي إحنا، كل واحد يطلع عليها يرى صورة الدين واضحة، هذه مسئوليتنا تجاه الإسلام، وهنكمل بكرة إن شاء الله بإذن الله سورة آل عمران وهنتكلم من خلالها عن آيات غزوة أُحُد اللي هي زي ما قولتلكوا كدة، يعنى ما تمنينا وما وددنا أن نتنصر في أُحُد ثم لا تنزل هذه الآيات

سبحانك اللهم وبحمدك أشهد ألا إله إلا أنت أستغفرك وأتوب إليك

تم بحمد الله

شاهدوا الدرس للنشر على النت في قسم [تفريغ الدروس](#) تفضلوا هنا :

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>